



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITII DISPUTATIONIBUS
*manè discutienda, in Scholis Medicorum, die Mercurii septimo mensis
Aprilis, Anno Domini M. DCC. LI.*

M. PETRO BERCHER, Doctore
Medico, Præsidente.

An nostris in Regionibus à potu glaciali abstinendum?

I.



UANTUM in vivendi modo peccent homines, solus ille novit qui auream diligit simplicitatem. Primi parentes victu admodum simplici, solâ aquâ, & oleribus ut plurimum contenti, senectutis limites attingebant ultimos, expertes tot malorum quæ secum invexit mensarum luxus. Diceret hodie de sanitatis pretio hominem non esse sollicitum. Nunc vigentes receptosque usus tantâ (qualescunque sint) amplectitur reverentiâ, ut ipsum puderet ab iis vel minimè declinare. Nunc solis irretitur blan-

A

dimentis, solis obtemperat sensibus. Conqueritur de suâ breviori vitâ, innumerisque lacessitâ morbis; medicis sese obliget legibus, sanus vivet, vivet & senex. Tutam noscet vivendi normam, quam non innoxie violari inconsultior multorum quotidiana satis comprobat experientia; potius ediscet proprii convenientisque delectum, in quo non leves ab omnibus ferè committuntur errores. Aqua, primus homini potus ac cæteris animantibus, nunc ad vitæ necessitatem, nedum ad voluptatem, vix sufficit. Magno parantur sumptu infiniti propè generis liquores, alii aliis generosiores atque ardentiores, mensarum, dicam, omnium delicie; cerevisia quoque, pomacea, vina, quæ pro soli naturâ, ætate, & vario conficiendi modo, variis prædita sunt dotibus, quorum ut multis quæsitus, arridensque potus, sic non rarò solet esse noxius. Nec tot irritamentis satiata conquievit gula; ne quid fortè intemperantiæ deficeret, insalubria salubribus miscuit, calida junxit frigidis, quin & nivem, glaciemque in usum traxit communem; ubique gentium in deliciis nunc habetur naturali corporis temperie frigidior potus, à quo quàm valde lædatur homo, vix credibile.

I I.

POTUS glacialis, frigore quo pollet eximio, æstuantis medicîna ventriculî, temperati venenum est. Sapiit igitur quisquis stomachum interrogat suum, & attentè dignoscit noxia ab utilibus, ut his utatur, illis verò abstineat, quid valeat, quid ferre recuset, quid ætati, temperamento, regioni, quid variis tribuendum anni tempestatibus. Ventriculus enim ingesta quæque non recipit impunè, à tali cibo vel potu delectatur vel lædatur. Æquali semper facultate non digerit omnia, æquali semper quippè non pollet virtute. Ad perfectæ digestionis opus requiritur exquisita partium quibus constant alimenta, vel minimarum dissolutio, nunquam bellè & ex naturæ votis peragenda, nisi superat priùs ciborum contentorum resistentiâ, fibræ ventriculi motrices nifum exerant, quo ulteriùs subigantur illi, & atterantur, ni blando prætereâ calore, aëreæ quibus turgent edulia, evolvantur molecule, & fluidorum dissolventium, intentiùs adaugeatur actio. Quæ omnia si quâcumque de causâ deficiant, imperfecta manet ciborum concoctio, grave reliquo corpori damnum indè allatura; qualis enim fuerit chylus, generosus, aut ignavus, benè aut malè subactus, prospere vel adverfè valetudinis, est causa. Primæ coctionis error alterius vitiandæ gradus est; non minùs ei nocent quæ illam frænant, quàm quæ nimium incitant. Uberiorem caloris ventriculî, & actuosarum alimenti particularum copiâ, quod in chylo pingue inest, aduritur, ac in sordes rancidas convertitur, vi eorum languidiore acefcunt alimenta, fructus velut immaturi, & acidos, nidorososque ractus efferunt; quibus igitur æstuat ultrâ modum ventriculus, regionum videlicet calidissimarum incolis, confert aliquandò glacialis potus, ne calore nimio, ipsorum torreantur viscera, membraque resolvantur: nos verò temperatæ regionis indigenæ talem procul rejiciamus potum, quo dejicitur ventriculî facultas, omnesque læduntur corporis partes.

I I I.

ÆSTIVO præsertim tempore viget apud nos potus glacialis usus; dùm autem extinguimus sitim, vel obtemperamus instigationi sensuum, quot acerba nobis imminet mala! Præter enim colicos dolores, tormina, cruciatus, quos ille potus affert ventriculo, ipsius pervertit tonum, nativum extinguit calorem, nec eum penetrare finit in minutores alimentorum moleculas, quas nedùm diluat & relaxet, cogit, densatque, nedùm liberet à vinculis, vegetiores illarum ligat, enervatque particulas, vetat ne succorum dissolventium, salivæ nimirum, succi gastrici, aliorumque fiat secretio, ipsorum, si qui sint secreti, obstat energiæ, aëris obtundit actionem; adde quòd æstivo præsertim tempore minor sit ventriculî vis, quòd tunc alimenta quavis serat difficiliùs, si fides Hippocrati qui vult *cibos æstate & autumnò difficiliùs ferri, hieme facillimè*, quia tunc ventres calidissimi, *vere minùs*; (a) undè Aristot-

(a) Aph. 28.
289, 2a

teles ætate ciborum paucitatem, potum è contrà instituit largiorem: nec immeritò sanè; si enim jam imbecillior ventriculus, caloris propter dissipationem, alimentorum mole obrueretur immoderatà, brevi fatisceret, omnisque illius pefundaretur facultas; si tunc glaciali impleatur potu, necessariò læditur, nulla vel saltem prava sit digestio: hinc nonnisi crudus & malè subactus chylus, venas subit ægrè cum sanguine commiscendus, obstructionum, morborumque graviorum ubique ferax. Si dubites, attende ad nativas sanguinis dotes, per quas stat vita, floretque sanitas, fluxilitatem nempe, ac tenuitatem, quibus singulis alluendis partibus aptus evadit, quoquoersum diffunditur, congruamque nutriendarum partium subministrat materiem, quas vivo latici dotes adimit crudioris admixtio materiæ, quæ ipsum inspissat, cogit, & ad permeandum, circulandumque longè facit ineptiorem. Ab hoc fonte morborum omnium causas, mortem ipsam quæ tot abripit inopinantes oriri, quid vetat asserere? Nec ventriculo solum potus glacialis officit, omnes corporis disturbat, pervertitque functiones, sanguinem ipsum valet etiam coagulare. Triplici enim potissimum de causâ coagulantur fluida; 1^o. nempe vel ex eo quòd ipsis infundatur acidum, quod singulos quosque spiculis suis involvens globulos, obstat ne secundum axem suum amplius gyrent, & spontè diffuant quaquoersum. 2^o. Quòd calore, & motu dissipetur liquor ille tenuissimus in quo natat fluidum. 3^o. Vel tandem quòd frigore extrudatur cælestis materia, ipsiusque imminuat motus, quo fluidi moleculas agit & volvit. Porro quâ frigus augetur proportionè, eâ extruditur & irretitur materia cælestis, adeò ut aucto magis ac magis frigore, avolet ipsius pars maxima, quiescatque superstes pars altera, & particule sanguinis crassiores ac viscidæ, non amplius agitatæ, ad invicem accedant, & in corpus agglutinentur solidum. Sic frigus quosdam passim enecat homines, sic quasdam interdum congelat corporis partes. Hinc faciliè deducitur quantâ frigus eximium cautione sit vitandum, quantâ proindè curâ sit abstinentum à glacie quæ intentiorem in se continet frigoris gradum.

I V.

IMMANE quod de potu frigidissimo variis ab authoribus observatum legitur apud Bartholinum! Dicit *Brucherinus*, non sibi tantum sed aliis non paucis aulicis, gulam vino in cellis subterraneis refrigerato penè fuisse emortuam (a); aliàs Gonzagam Mantuanorum Principem potu glaciei fuisse extinctum (b); à nimia oris collutione cum frigida in acutâ febre mortuam mulierem notat *Nicol. Tulpinus* (c); quidam nimio aquæ frigidæ potu syncope mortuus est apud *Marcellum Donatum* (d), quod in nobili Patavino vidit *Benedictus Sylvaticus* (e); colonix agripinnæ referunt quemdam ex nivato vino subito expirasse (f); narrat & ipse *Bartholinus* ex potu nive intentius refrigerato uvulas sæpè procidisse (g); aliàs observavit in navatâ sanguinem in extremis frigore fuisse congelatum (h). Quid mirum! si tot mala, mortem ipsam secum inferat usus glaciei, quæ ob summum quo donatur frigus, cunctis corporis partibus, præcipuè nervis est insensibilissima, uno fatentibus ore Medicis omnibus ab Hippocrate qui pluries nos docet *frigidum convulsiones, tetanos, nigrores, & rigores febriles adferre; inimicum esse ossibus, dentibus, nervis, cerebro, dorsali medulla, calidum vero amicum; frigida, veluti nivem & glaciem pectori inimica, tusses movere, venarum ruptiones, & destillationes efficere* (i). Diceret tamen sibi non omnino consensisse, divinum senem, nec eum potum frigidissimum planè rejecisse; ipsi enim non semel placuit una vini & aquæ perfrigeratio subdío, & ab agrotantibus utrumque iussit propinari, aliàs decocta eadem arte refrigerata & clysmos in febribus ardentibus epythemata in erysipelate pulmonis usurpare non reformidavit; nec Galenum ipsius prementem vestigia, alimentis, medicamentis, potibusque diversis, nivem glaciemque penituit admovisse: plures alii veteres inter, Avicenna, Archigenes, Aëtius, recentiorumque non pauci nivem & glaciem, modò intrâ, modò extrâ corpus adhibuere. Famola nunc extant exempla

(a) Thom. Barth. de niv. usu pag. 199. cap. 35.
(b) Eod. cap. pag. 200.
(c) Ibid.
(d) Ibid.
(e) Ibid.
(f) Ibid.
(g) Pag. 178.
(h) Ibid.
(i) Ibid.

(i) Lib. 1. Aph. 17. 18. 24.

(k) Un Capucin Sicilien & son frere, Voyez Traité des Vert. méd. de l'Eau com. Tom. 1. pag. 467. & suiv.

(l) Galen. lib. de Sanit. tuend. c. 13.

(m) Hipp. lib. 2. de vict. rat.

infinitorum cujuscunque generis morborum qui glaciæ folius vel nivis ope perfectè fuerunt sanati. Nuperrimè fuerunt apud Neapolitanos & Melitenfes viri duo (k) qui stupenda potu solo glacialis aquæ patrarunt, qui plurimos orci revocarunt è faucibus, qui phthyses, tusses inveteratas, asthma, variolas, febres malignas, affectus nephriticos, tremores, dysenterias, colicos dolores, luem venercam, ventriculi imbecillitates feliciter admodum curarunt, obstructions referarunt, skirros resolverunt penitus. Num tot exemplis potùs glacialis utilitas satis abundè non evincitur? Ne licentiæ præberent ansam caverunt Medicinæ Principes, Hippocrates, Galenus, his solùm glaciem non omninò recusant, qui calidissimo, robustissimo quoque donantur temperamento, qui corpus plurimùm exercent, & dum tempestas est ferventissima; monent interim, ut ab ipso caveant pueri, senes, mulieres: pueri ne frigus nervos ipsorum visceraque resolvat tenerima; senes ne ipsis spasmodum, paralyfim citò inducat; mulieres, ne frigidior ipsarum natura fatiscat, cohibeanturque menstrua. Juvenibus etsi potus talis noxà sensibili, statim non officiat, huic tamen inconsideratè non indulgeant, ne progrediente ætate, ipsorum articuli nervi quoque ac viscera morbis corripiantur vix aut nunquam sanandis (l). Si autem glacialis potus quandoque successerit in regionibus scilicet calidissimis, ægrotantibusque nonnullis, quos furens depascebatur ignis; non omnibus idcirco, nec cuique regioni inter mensas est suadendus; nam » plus æquo frigidus tùm spiritus, tùm cibus & potus humidum in corpore congelant, & congelatione ac frigore alvos cogunt (m). Hinc certa mali labe, hinc plurimos singulis quibusque annis videmus, vel uno glacialis aquæ cyathos, in gravissimos præcipitari morbos, è quibus vix potest unus liberari.

V.

QUANTUM ad sanitatem accurata, tantùm ad morbum confert inconsiderata vivendi ratio. Homo compositus ad naturæ leges, diù vivit & valet; parco laudabileque dum vescitur cibo, & potu, omnibus quasi morbis sese facit immunem. Felix si justum in rebus teneret medium! Quantum ab illo descebat, tristis eheu nimum testatur experientia! Dicant, qui fontes amant bibere glaciales, quot in morbos inciderint, quot passi sint incommoda, quoties vitæ incurrerint periculum! Quandoque tamen adeò fervet aër, ut sudore totum quasi liquecat corpus: certè quidem non idèo quæsieris malum ita leve sanitatis, vitæque dāmo sublevare, in cellis subterraneis asservetur vinum, aqua è puteis hauriatur profundis, eaque vinum diluatur, tunc præsto est potus mediocriter frigidus, qui moderatam expleat libidinem, arrideat ventriculo, ciborumque adjuvet concoctionem, si verò æstus, sitisque urgeat anihela, & ulterior exoptetur frigiditatis gradus, lagenæ demittantur in puteum, ita tamen ut aquam non attingant, aër enim vicinis aquæ, frigiditatem ab illâ contrahit, liquorem magis penetrat & intimiùs quàm aqua, potentiusque suspensas refrigerat lagenas. Industriâ tali habebitur suadente Riverio (a) potus suavis & salubris, par extinguendæ siti qui nec ventriculum offendet, nec viscera, quod à potu glaciali sperare nefas, ut potè qui viscera labefaceret, ventriculum imprimis, & fauces lædat, alimentorum præpediat coctionem, nativum extinguat calorem, nervos offendat, infinitos propè morbos, mortem ipsam subito valeat accerfere, undè meritò concludimus.

(a) Lib. 4. par extinguendæ siti. med.

Ergo nostris in Regionibus à potu glaciali abstinendum.

Proponebat Parisiis PAULUS LE ROY, Aurelianus, Saluberrimæ Facultatis Medicinæ Parisiensis Baccalaureus, A. R. S. H. 1751,

A S E X T A A D M E R I D I E M.

Typis QUILLAU, Universitatis & Facultatis Medicinæ Typographi, 1751.